

## **PREDLOG**

Na osnovu člana 83 stav 7 i člana 84 stav 6 Zakona o državnim službenicima i namještenicima ("Službeni list CG", broj 2/18), Vlada Crne Gore, na sjednici od 2019. godine, donijela je

### **UREDBU O OCJENJIVANJU RADA DRŽAVNIH SLUŽBENIKA I NAMJEŠTENIKA**

#### **I. OSNOVNE ODREDBE**

##### **Predmet Član 1**

Ovom uredbom propisuju se bliža mjerila, način i postupak ocjenjivanja rada državnih službenika i namještenika, kao i zaposlenih u pravnom licu iz člana 3 st. 2 i 3 Zakona o državnim službenicima i namještenicima (u daljem tekstu: drugi zaposleni).

##### **Upotreba rodno osjetljivog jezika Član 2**

Izrazi koji se u ovoj uredbi koriste za fizička lica u muškom rodu podrazumijevaju iste izraze u ženskom rodu.

#### **II. MJERILA ZA OCJENJIVANJE**

##### **Mjerila za ocjenjivanje rada lica koja vrše poslove visokog rukovodnog kadra i starještine organa uprave**

##### **Član 3**

Mjerila za ocjenjivanje rada lica koja vrše poslove visokog rukovodnog kadra i starještine organa uprave i drugih zaposlenih iz katerogije visoki rukovodni kadar, su u okviru kriterijuma:

- ispunjavanje radnih zadataka: usmjerenost na rezultate, sprovođenje utvrđenih ciljeva i usmjerenost na razvoj i motivaciju službenika;
- rezultati rada u pogledu kvaliteta i kvantiteta: stepen realizacije zadataka i kvalitet postignutog, stručnost i sposobnost organizacije rada;
- obim i blagovremenost u vršenju poslova radnog mjesta: efikasnost, upravljanje promjenama i postavljanje prioriteta;
- druge sposobnosti i vještine koje pokazuje u vršenju poslova: liderstvo, saradnja, komunikacija i inovativnost.

##### **Mjerila za ocjenjivanje rada državnih službenika Član 4**

Mjerila za ocjenjivanje rada državnih službenika i drugih zaposlenih, osim službenika i drugih zaposlenih iz člana 3 ove uredbe, su u okviru kriterijuma:

- ispunjavanje radnih zadataka: sposobnost planiranja i izvršavanje radnih zadataka;
- rezultati rada u pogledu kvaliteta i kvantiteta: stručnost, tačnost i pouzdanost u obavljanju poslova i stepen realizacije radnih zadataka;
- obim i blagovremenost u vršenju poslova radnog mjesta: pridržavanje rokova za izvršavanje poslova, sposobnost usklajivanja radnih zadataka sa prioritetnim aktivnostima organa u kojem državni službenik radi i efikasnost u izvršavanju radnih zadataka;
- druge sposobnosti i vještine koje pokazuje u vršenju poslova: inovativnost i kreativnost, pismeno i usmeno izražavanje, vještina komunikacije i timski rad.

## **Mjerila za ocjenjivanje rada namještenika**

### **Član 5**

Mjerila za ocjenjivanje rada namještenika i drugih zaposlenih koji vrše poslove namještenika su u okviru kriterijuma:

- ispunjavanje radnih zadataka: tačnost i preciznost;
- rezultati rada u pogledu kvaliteta i kvantiteta: pouzdanost u obavljanju poslova i ekonomičnost;
- obim i blagovremenost u vršenju poslova radnog mjesta: upravljanje vremenom i efikasnost;
- druge sposobnosti i vještine koje pokazuje u vršenju poslova: komunikacija i prilagodljivost.

## **III. NAČIN I POSTUPAK OCJENJIVANJA**

### **Praćenje rada**

#### **Član 6**

Rukovodilac organizacione jedinice u kojoj je državni službenik, odnosno namještenik i drugi zaposleni iz čl. 4 i 5 ove uredbe raspoređen (u daljem tekstu: neposredni rukovodilac) dužan je da tokom kalendarske godine kontinuirano prati rad i postupanje tog državnog službenika, odnosno namještenika i drugog zaposlenog, podstiče na kvalitetno i djelotvorno izvršavanje službenih zadataka, poštovanje službene dužnosti i primjereni ponašanje i da ukazuje na propuste i nepravilnosti u radu.

### **Način utvrđivanja predloga ocjene rada**

#### **Član 7**

Neposredni rukovodilac vrši ocjenjivanje rada državnog službenika, odnosno namještenika i drugog zaposlenog iz čl. 4 i 5 ove uredbe ocjenom od 1 do 3 po svakom od mjerila u okviru kriterijuma, nakon čega se, dijeljenjem zbira ocjena po svim mjerilima u okviru jednog kriterijuma brojem tih mjerila, utvrđuje ocjena po svakom od kriterijuma.

Predlog ocjene rada državnog službenika, odnosno namještenika i drugog zaposlenog iz čl. 4 i 5 ove uredbe utvrđuje se na osnovu rezultata dobijenog dijeljenjem zbira ocjena po svim kriterijumima brojem kriterijuma, tako da taj rezultat predstavlja odgovarajuću ocjenu rada, i to:

- rezultat od 2,51 do 3,00 - predlog ocjene rada je "ističe se";
- rezultat od 1,51 do 2,50 - predlog ocjene rada je "dobar";
- rezultat manji od 1,51 - predlog ocjene rada je "ne zadovoljava".

### **Ocenjivanje u slučaju promjene neposrednog rukovodioca**

#### **Član 8**

Neposredni rukovodilac kome tokom kalendarske godine prestane rad u organizacionoj jedinici vrši ocjenjivanje rada državnog službenika, odnosno namještenika i drugog zaposlenog iz čl. 4 i 5 ove uredbe u toj organizacionoj jedinici, u skladu sa članom 7 ove uredbe.

Ocenjivanje iz stava 1 ovog člana vrši se na obrascu, u skladu sa Zakonom o državnim službenicima i namještenicima (u daljem tekstu: Zakon), koji neposredni rukovodilac potpisuje i odlaže u personalni dosije državnog službenika, odnosno namještenika i drugog zaposlenog iz čl. 4 i 5 ove uredbe.

Prilikom utvrđivanja predloga ocjene rada državnog službenika, odnosno namještenika i drugog zaposlenog iz čl. 4 i 5 ove uredbe, u skladu sa Zakonom, uzimaju se u obzir ocjene rada iz stava 1 ovog člana.

## **Ocenjivanje u slučaju rasporedivanja državnog službenika, odnosno namještenika**

### **Član 9**

Ako se državni službenik, odnosno namještenik i drugi zaposleni iz čl. 4 i 5 ove uredbe tokom kalendarske godine rasporedi iz jedne u drugu organizacionu jedinicu unutar istog državnog organa ili u drugi državni organ, neposredni rukovodilac organizacione jedinice u kojoj je državni službenik, odnosno namještenik i drugi zaposleni radio prije raspoređivanja vrši ocjenjivanje njegovog rada za taj period u skladu sa članom 7 ove uredbe.

Ocenjivanje iz stava 1 ovog člana vrši se u skladu sa članom 8 stav 2 ove uredbe.

Neposredni rukovodilac u organizacionoj jedinici, odnosno državnom organu u koji je državni službenik, odnosno namještenik i drugi zaposleni iz čl. 4 i 5 ove uredbe raspoređen u trenutku ocjenjivanja utvrđuje predlog ocjene rada u skladu sa Zakonom, uzimajući u obzir ocjene rada iz stava 1 ovog člana.

### **Upoznavanje sa predlogom ocjene rada**

### **Član 10**

O upoznavanju državnog službenika, odnosno namještenika i drugog zaposlenog iz čl. 4 i 5 ove uredbe sa predlogom ocjene rada, neposredni rukovodilac sačinjava službenu zabilješku u koju unosi datum upoznavanja i eventualno neslaganje državnog službenika, odnosno namještenika i drugog zaposlenog sa predlogom ocjene rada, kao i razloge neslaganja.

Zabilješka iz stava 1 ovog člana, uz predlog ocjene rada, dostavlja se rukovodiocu organizacione jedinice iz kategorije visoki rukovodni kadar.

### **Ocenjivanje rada lica koja vrše poslove visokog rukovodnog kadra i starještine organa**

### **uprave**

### **Član 11**

Na praćenje rada, način utvrđivanja predloga ocjene rada i upoznavanje sa predlogom ocjene rada lica koja vrše poslove visokog rukovodnog kadra i starještine organa uprave shodno se primjenjuju odredbe čl. 6, 7 i 10 ove uredbe.

## **IV. ZAVRŠNE ODREDBE**

### **Prestanak važenja**

### **Član 12**

Danom stupanja na snagu ove uredbe prestaje da važi Uredba o mjerilima i načinu ocjenjivanja državnih službenika i namještenika („Službeni list CG“, broj 33/13).

### **Stupanje na snagu**

### **Član 13**

Ova uredba stupa na snagu danom objavljivanja u "Službenom listu Crne Gore".

Broj:  
Podgorica, 2019. godine

**Vlada Crne Gore**

**Predsjednik,  
Duško Marković**